

27.07.2026

UKA2026/378

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunaqarfinni aqutsisut piginnaatitaaffiisa najukkamilu aalajangiinernut piviusumik sunniteqarsinnaanerisa nukittorsarneqarnissaat siunertaralugu inatsisit atuuttut allanngortinneqarnissaannik siunnersuummik kingusinnerpaamik UPA2027-mi saqqummiussinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Allannguutini nunaminertanik atuinissamik najukkamilu pilersaarusiornissamik aalajangiinernut sunniteqarsinnaanerup annertusarneqarnissaa, najukkani siunertanut aningaasaliissutit erseqqissumik killiligaasut pingaarnersiorneqarnissaat kiisalu tusarniaavigineqarsinnaatitaanerup inassuteqarsinnaatitaanerullu nukittorsarneqarnissaat ilaatinneqassapput.

(Inatsisartunut ilaasortaq Jens NapâtôK', Naleraq)

Tunngavilersuut:

Nunaqarfinni aqutsisut Kalaallit Nunaanni nunaqarfinni najukkami tamat oqartussaaqataanerannut pingaarutilimmik ilaapput. Taamaakkaluartoq nunaqarfinni aqutsisut ullumikkut pingaarnertut siunnersuineq suliasarivaat, nunaqarfiillu ineriartornerannut, inoqarfiunerannut ulluinnarnilu inuunermut toqqaannartumik amerlanertigullu aalajangiinernut pingaaruteqartunut piviusumik sunniteqarsinnaanerit killeqarpoq.

Piginnaatitaaffiit killeqarnerat najukkami tamat oqartussaaqataanerannik sanngiillisitsisinnaavoq, aalajangiinerillu qitiusumut katersuutsinneqarnerannik najukkamilu aalajangeeqataasinnaannginnermik misigilersitsisinnaalluni. Peqatigisaanik nunaqarfiit namminneq ineriartornerminnut annertunerusumik akisussaaftimmik tigusisinnaanerat killeqartinneqarpoq.

Siunnersuutip siunertaraa nunaqarfinni aqutsisut piginnaatitaaffiisa annertusarneqarnissaat erseqqissumillu nassuiarneqarnissaat, taamaalilluni najukkamut pingaaruteqartunik aalajangiinerit sapinngisamik innuttaasunut qanittumi, nunaqarfimmi pissutsit, pisariaqartitat ineriartornissamullu periarfissat tunngavigalugit aalajangiiffigineqartassallutik.

Inatsisiliornermut atatillugu Naalakkersuisut ilaatigut periarfissat uku misissorlugillu aalajangersartariaqarpaat:

- nunaminertanik atuinissamik najukkamilu pilersaarusiornissamik aalajangiinernut sunniteqarsinnaanerup annertusarnissaa,

- aningaasaliissutit erseqqissumik killiligaasut najukkami siunertanut pingaarnersiuffiginissaannut atornissaannullu periarfissaqalerneq,
- kommunit Namminersorlutik Oqartussallu aalajangiinerini nunaqarfimmut ataasiakkaamut annertuumik pingaaruteqartuni tusarniaavigineqarsinnaatitaanerup inassuteqarsinnaatitaanerullu nukittorsarneqarnissaat,
- nunaqarfimmi sanaartornermut ineriartortitsinermullu suliniutinut annertunerusumik akisussaaffeqarnissaq,
- isumaginninnermut, kulturimut ataatsimoornermullu sammisunut akisussaaffiup annertusarnissaa,
- nunaqarfinni aqutsisut piginnaatitaaffiit, akisussaaffiit aningaasatigullu periarfissaannut malittarisassat erseqqissut,
- najukkamut annertuumik pingaaruteqartunik aalajangiisoqannginnerani kommunalbestyrelsit aamma Naalakkersuisut nunaqarfinni aqutsisunik pineqartunik peqataatitsisussaataitanerat.

Piginnaatitaaffiit agguataarneqarnerisa erseqqissumik aalajangersarneqarnissaat pingaaruteqarpoq, nunaqarfinni aqutsisut, kommunalbestyrelsit Naalakkersuisullu akornanni piginnaatitaaffiit qanoq agguataarsimanerat nalornissutigineqalinnginniassammat.

Nunaqarfinni aqutsisut nukittorsarneqarnerisigut najukkami peqataanerup annertusarnissaa, aalajangiinerit pitsaanerunissaat nunaqarfiillu piujuartitsinerusumik ineriartortinneqarnissaat anguneqarsinnaassasut naatsorsuutigineqarpoq. Nunaqarfinni najugaqartut najukkami pissutsinik ilisimasaqarnerpaapput. Taamaattumik sinniisaat tamat oqartussaaqataaneratigut qinigaasut nunaqarfiup siunissaanik ilusilersuisunut aalajangiinernut piviusumik sunniuteqarsinnaasariaqarput.

Pisortanut aningaasatigut allaffissornikkullu kingunerisassat

Naalakkersuisut inatsisissatut siunnersuummik suliaqarnerat allaffissornikkut aningaasartuutininik AC-mut atorfillip ukiup affaani sulineranut naapertuuttunik, 250.000 kr.-inik missiliorneqartunik, kinguneqassasoq nalilerneqarpoq.

Kingorna allannguutininik atuutilersitsineq Namminersorlutik Oqartussanut, kommuninut nunaqarfinnilu aqutsisunut aningaasatigut imaluunniit allaffissornikkut kinguneqarsinnaavoq. Kingunerisassat annertussusaat piginnaatitaaffiit suliaassallu qanoq agguataarneqarnissaannut apeqqutaassaaq. Taamaattumik inatsisissatut siunnersuummut atatillugu Naalakkersuisut kingunerisassat sukumiinerusumik qulaajaasariaqarpaat.

Namminersorlutik inuussutissarsiortunut aningaasatigut allaffissornikkullu kingunerisassat



Aalajangiiffigisassatut siunnersuutip immiini namminersorlutik inuussutissarsiuteqartunut aningaasatigut imaluunniit allaffissornikkut kinguneqarnissaa naatsorsuutigineqanngilaq.

Innuttaasunut aningaasatigut allaffissornikkullu kingunerisassat

Aalajangiiffigisassatut siunnersuutip innuttaasunut toqqaannartumik aningaasatigut imaluunniit allaffissornikkut kinguneqarnissaa naatsorsuutigineqanngilaq. Najukkamili aalajangeeqataanerup nukittorsarneqarneratigut innuttaasut nunaqarfimminnut tunngasunik aalajangiinernut annertunerusumik sunniuteqarsinnaalersinnaapput.